

絕妙好詞箋

上冊

絕妙好詞箋

(本書用四部備要紙型校訂重印)

絕 妙 好 詞 箋

(全二冊)

(宋)周 密輯

〔清〕查為仁 展 鶴鑑

*

中 華 書 局 出 版

(北京東總布胡同57號)

北京市書刊出版業營業許可證出字第17號

中華書局上海印刷廠印刷 新華書店總經售

*

850×1168 耗 1/32 • 16 13/16 印張 • 100,000 字

1957年12月第1版

1957年12月上海第1次印刷

印數：1—13,100

定價：(7)1.80元

統一書號：10018.18

原序

粵稽詩降爲詞六朝潛啓其意而體創于李唐五代
繼隆其軌而風暢于趙宋柳屯田之曉風殘月蘇學
士之亂石崩雲世所共稱固無論已建炎而後作者
斐然數南渡之才人無非妍手詠西湖之麗景盡是
端家薄醉尊前按紅牙之小拍清歌扇底度白雲之
新聲況乎人間玉椀闕下銅駝不無荆棘之悲用誌
黍離之感文弦鼓其淒調玉笛發其哀思亦有登山
臨水勝情與豪素爭飛惜別懷人秀句共郵筒俱遠
凡斯體制有待纂編于是草窗周氏彙次成書山玉

川珠供其採擷蜀羅趙錦藉彼翦裁蔡家幼婦之碑
固應無媿黃氏散花之集詎可齊觀秀遠爲前此所
無規矩實後來之式然而劍氣長埋珠光易匿五百
年之星移物換金石尙爾銷沈一卷書之雲散波流
簡帙能無散佚於今風雅殆勝曩時翡翠筆牀人宗
石帚瑠璃硯匣家擬梅溪爰有好事之家千金購其
善本嗜奇之士古鼎質其祕書時歲甲子訪戚虞山
叔丈遵王招攜永日郝方回之游讌久欽逸少門風
盧子諒之婚姻夙埶劉琨世戚觴詠之暇籤軸斯陳
謝氏五車未足方其名貴田宏萬卷猶當遜其珍奇

得此一編如逢拱璧不謂失傳已久猶能藏弄至今
諷詠自深剗劘有待河北膠東之紙傳此名篇然脂
弄墨之餘成余素志上偕諸父俾我弟昆共訂魯魚
重新梨棗從此光華不沒風景常新非惟一日之賞
心允矣千秋之勝事武唐柯煜序

珍倣宋版印

〇〇〇四

草窗周公謹集選宋南渡以後諸人詩餘凡七卷名之曰絕妙好詞公謹生於宋末以博雅名東南所作音節淒清情寄深遠非徒以綺麗勝者茲選披沙揀金合一百三十二人爲詞不滿四百亦云精矣余嘗論選家以今稽古病在不親穀梁所謂聽遠音者聞其疾而不聞其舒也若同時之人徵蒐該博參互詳審其去疵瘠正謬悠較之後代難易什伯宋人選宋詞如曾慥樂府雅詞趙粹夫陽春白雪以及謫仙蘭畹諸集皆名存書逸每爲可惜草窗所選乃虞山錢氏祕藏鈔本柯子南陔得之與其從父寓匏舍人及

余考校缺謨繕刻以行夫古書顯晦各有其時

皇上聖學淵奧凡經史子集以及類說稗乘罔不搜
討宋元舊本漸已畢出彼曾趙諸集又豈無摻廢簾
而弄之者是書之出其嚆矢夫康熙戊寅夏五江邨
高士奇序於清吟堂

絕妙好詞紀事

何焯讀書敏求記跋絳雲未燼之先藏書至三千九百餘部而錢遵王此記凡六百有一種皆紀宋板元鈔及書之次第完闕古今不同手披目覽類而載之遵王畢生之菁華萃於斯矣書旣成局之枕中出入每自攜靈蹤微露竹垞謀之甚力終不可見竹垞旣應召後二年典試江左遵王會於白下竹垞故令客置酒高譙約遵王與偕私以黃金翠裘予侍書小史啓鐫豫置楷書生數十於密室半宵寫成而仍返之當時所錄并絕妙好詞在焉詞旣刻函致遵王漸

知竹垞詭得且恐其流傳於外也竹垞乃設誓以謝之又跋遵王纂成此書祕之笈中知交罕得見者竹垞檢討校士江南日龔方伯遍召諸名士大會秦淮河遵王與焉是夕私以黃金青鼠裘予其侍史啓篋得是編命藩署廊吏鈔錄并得絕妙好詞旣而詞先刻遵王疑之竹垞爲之設誓以謝之不授人也按柯崇樸絕妙好詞序云往余與朱檢討竹垞有詞綜之選撫拾散逸采掇備至所不得見者數種周草窗絕妙好詞其一也嗣聞虞山錢子遵王藏有寫本余從子煜爲錢氏族壻因得假歸然傳寫多訛逮再三參

考始釐然復歸于正爰鏤板以行之據此則非先生所詭得矣義門之言近誣楊謙朱竹垞先生年譜康熙二十年辛酉五十三歲

厲鶚字太鴻號樊榭錢塘人康熙五十九年舉人乾隆元年薦舉博學鴻詞有樊榭山房集徵君性情孤峭義不苟合讀書摻奇愛博鉤新摘異尤熟於宋元以來叢書稗說以孝廉需次縣令將入京道經天津查蓮坡先生留之水西莊觴咏數月同撰周密絕妙好詞箋遂不就選而歸揚州馬秋玉兄弟延爲上客嗣後往來竹西者凡數載馬氏小玲瓏山館多藏舊

書善本閒以古器名畫因得端居探討所撰宋詩紀事遼史拾遺極爲詳洽今皆錄入

四庫書中其先世家於慈谿故以四明山樊榭爲號予於戊辰歲在長洲趙君飲谷小吳船遇之辱爲忘年交嗣後徵君過吳必訪余于朱氏薺花水閣凡三年而徵君下世其詞直接碧山玉田予錄入琴畫樓詞鈔樊榭下世葬于杭州西溪王家鵝因無子嗣不久化爲榛莽後四十餘年何君春渚琪游西溪田舍見草堆中樊榭及姬人月上栗主在焉取歸偕同人送武林門外牙灣黃山谷祠埽灑一室以供之予爲

撰丈室花同天女散摩圍詩共老人參句以題其楹
李光甫方湛蔣蔣邨炯陶鳧香梁諸子皆有詩詞記
之樊榭生于康熙三十一年五月初二日辰時歿于
乾隆十七年此十四字原本失寫今據栗主補入九
月十一日辰時月上姓朱氏名滿孃烏程人生于康
熙五十八年三月二十四日辰時歿于乾隆七年正
月初三日戌時並屬蔣邨及項金門墉許周生宗彥
各于忌日奉酒脯薦焉王昶蒲褐山房詩話 蔡木
龕混云厲徵君子繡周有女適桑穀甫先生之孫近
仁繡周亡後其妻丁氏龍泓先生女無所歸奉厲氏

先代栗主依于桑桑家車橋先與其甥倪米樓稻孫同居而北郭之童佛庵銓又故與米樓善性好奇一日訪米樓值無人遂于厲氏家廟中檢徵君暨月姬主懷歸月姬主爲樊榭手書樊榭主爲丁龍泓手書也童以告何春渚琪詭言得之西溪田舍草堆中何轉告王述庵司寇因率同人度置湖市宋黃文節公祠各醵百錢致祭時爲嘉慶六年四月六日也不一載其事卽廢道光丁亥春正月二十二日邑人公請其主由黃公祠移供西溪之焚蘆庵塔院內顛末詳載厲徵君祀志

欽定四庫全書總目提要集部詞曲類詞選之屬

絕妙好詞箋七卷兵部侍郎紀昀家藏本

絕妙好詞宋周密編其箋則

國朝查爲仁厲鶚所同撰也密所編南宋歌詞始
於張孝祥終於仇遠凡一百三十二家去取謹
嚴猶在曾慥樂府雅詞黃昇花菴詞選之上又
宋人詞集今多不傳併作者姓名亦不盡見於
世零璣碎玉皆賴此以存於詞選中最爲善本
初爲仁採摭諸書以爲之箋各詳其里居出處
或因詞而攷證其本事或因人而附載其佚聞

以及諸家評論之語與其人之名篇秀句不見於此集者咸附錄之會鶚亦方箋此集尙未脫藁適遊天津見爲仁所箋遂舉以付之刪複補漏合爲一書今簡端並題二人之名不沒其助成之力也所箋多泛濫旁涉不盡切於本詞未免有嗜博之弊然宋詞多不標題讀者每不詳其事如陸淞之瑞鶴仙韓元吉之水龍吟辛棄疾之祝英臺近尹煥之唐多令楊恢之二郎神非參以他書得其原委有不解爲何語者其疏通證明之功亦有不可泯者矣密有癸辛雜識